

مسرحية الأطفال

مجنون في العيد

تأليف : طلال المولوي

الفصل الأول :-

المنظر :-

ساحه وسط البيوت باحد الأحياء السكنية .. في زاويه من المسرح يظهر دكان صغير وهناك شارع لعبور السيارات يظهر جزء مقطعي منه واضح على المسرح حيث تظهر اشارة المرور واضحة وخطوط المشاه كذلك .. مع بداية المسرحية تدخل مريوم وعبود وصلوح بملابسهم الجديده فرحين بالعيد يطرقون ابواب البيوت وينشدون عيدكم مبارك يا اهل البيت تلمح مريوم حمود عن بعد وتتاديه ..

- مريوم : حمود .. حمود ..
ص : ايش تبين يا مريوم ..
حمود
مريوم : تعال يا حمود ..
(يدخل حمود وهو بملابس رياضييه وكأنه خجول من ملابسه)
حمود : خير يا مريوم .. ايش تبين مني ..
مريوم : الناس يوم العيد .. يقولون كل عام وانتوا بخير
حمود : ايه صح .. كل عام وانتوا بخير ..
عبود : حمود .. انت ليش مب لابس ملابس العيد ..
حمود : لا .. ملابس العيد .. الحين بروح البسهم ..
صلوح : اشتنظر بعد .. يالله بسرعه احنا بننظرك علشان تروح تعيد معانا ..
حمود : لا لا تنظروني انتوا روحوا وانا بالحقكم ..
عبود : احنا ننظر مجود وما فيها شي ننظرك بعد ..
مريوم : ما شفت مجود وين راح
حمود : يمكن راقد في البيت ..
مريوم : لا اخوي مجود طلع مع ابوي من الصبح وراح صلى صلاة العيد
حمود : خلاص اذا شفته بقوله انكم تدورون عليه ..
صلوح : يالله احنا بنروح نعيد ذاك الصوب ومجود وحمود بيلحقونا بعدين ..

- عبود : خلونا اول نمر الدكان نشتري حلويات ٠٠
- مريوم : عبود انت ما تشبع من الحلويات كم مره مريت فيها على الدكان كل ما عيدنا اشوي تمر على الدكان ٠٠
- حمود : كلام مريوم صح ٠٠ ترى الحلويات تضرك وتظر اسنانك غير وروح المعصره
- صلوح : أي نروح المعصره
- مريوم : انتو ما تشبعون اكل
- عبود : انا يوعان خاطري في سندويش نقانق
- صلوح : وانا خاطري في هامبرجر
- مريوم : انا بروح وبخليكم (تخرج مريوم)
- عبود : مريوم ٠٠ صلوح ٠٠ يالله نلحقها
- صلوح : مريوم وقفي يا مريوم
- (يخرجان خلفها ويقي حمود حزيناً)
- حمود : ابي اعيد مثلهم بس ما عندي ثياب جديده للعيد محد اشترى لي امي ما عندها فلوس تشتريلي ٠٠ ومستحي اقول حق ربعي ان ما عندي ثياب للعيد (يسمع صوت قادم)
- في حد جاي خلني انخش علشان ما يشوفوني بها الملابس ويضحكون علي (يختفي حمود)
- (يدخل رشود وورده وهما يلبسان ملابس العيد ايضاً ولكن ملابسهم غير متناسقه)
- رشود : ورده ٠٠ تعالي ٠٠ كم عيدتي ٠٠
- ورده : بس عشرين ريال ٠٠
- رشود : وانا بعد عندي ثلاثين ريال ٠٠
- ورده : اكيد فروج اخونا عيد اكثر منا ٠٠
- رشود : لا ٠٠ يمكن للحين ما عيد ولا ريال ٠٠ لأن ما كان عنده ثياب للعيد
- ورده : ليش ما قلت لي ٠٠
- رشود : يعني ايش بتسوين ٠٠
- ورده : انا امس بقت هالثياب اللي لابستها اللحين ٠٠

- رشود : وانا بعد بقت هالثياب
- ورده : انا عندي فكره يا رشود
- رشود : شنهى الفكره يا ورده
- ورده : نروح نبوق ثياب حق اخوي فروج
- رشود : فكره حلوه ياالله ..
- يخرجان))
- الحراميه .. مب حرام عليهم يبقون ثياب العيد .. كل واحد شاري له
- حمود : ثياب جديده وفرحان بالعيد هالحراميه يقومون يبقونها ايش اسوي يا ربي
- ..
- (يدخل مجود وهو ينشد عيدكم مبارك)
- مجدود : حمود .. عيدك مبارك
- حمود : مجود .. انت وينك من الصبح
- مجدود : انا كنت اعيد
- حمود : رايح تعيد بروحك واختك مريوم وعبود وصلوح ينظرونك
- مجدود : لا انا رحت عيدت على الكبار جدتي وجدي وخالي وخالتي وعمي وعمتي
- وراعي الدكان الستى ..
- حمود : انزين الحقهم هم راحو هالصوب (يشير ناحية خروج مريوم ومن معها)
- مجدود : خلاص بالحقهم الحين (ينتبه لشيء) حمود انت ليش مب جاي تعيد معانا
- حمود : لا .. انا مشغول شوي ..
- مجدود : مشغول في شنهو مشغول .. بعدين ليش مب لابس ملابس العيد
- حمود : ملابس العيد .. ايه اللحين بروح البس ..
- مجدود : انزين بسرعه .. انا انطرك
- حمود : مجود .. انت روح وانا بالحقك
- مجدود : لا لا انا بنطرك .. ياالله روح البس بسرعه
- حمود : مجود .. يا اخي انا بصراحه ما عندي ملابس جديده للعيد ..
- مجدود : يعني ما عندك ثياب حق العيد .. ولىش ما شريت ثياب للعيد
- حمود : انت تدري يا عبود .. انا فقير وابوي متوفي ..
- مجدود : ابوك متوفي .. انت ما قلت ان ابوك ميت

- حمود : ايه ميت ومتوفي نفس الشئ ..
- مجود : ولىش ما قلت لي يا حمود
- حمود : كنت مستحي ..
- مجود : حمود .. انت رفيجي حد يستحي من رفيجه .. ولا يهملك .. انا فصلت للعيد ثوبين .. بعطيك ثوب تعيد فيه
- حمود : بس يا عبود هذي ثيابك ما يصير اخذها
- مجود : فرحة العيد يا حمود لما كلنا نفرح مع بعض
- حمود : مشكور يا مجود ..
- (مجود يخلع ثوبه)
- حمود : مجود ايش تسوي
- مجود : بعطيك الثوب
- حمود : بس هذا الثوب انت لابس .. انت ما قلت ان عندك ثوبين ..
- مجود : انا لابس الثوبين فوق بعض قلت يمكن ثوب يتوصخ على طول ابدل ..
- (مجود يهم بخلع ثوبه)
- حمود : بتفصخ في الشارع ..
- مجود : اشفيك انت .. انا لابس تحت الثوب الثاني (يخلع ثوبه ويعطيه لحمود)
- حمود : مشكور يا مجود اللحين باحس بطعم العيد ..
- مجود : ياالله بسرعه البس الثوب علشان نلحق على العيد
- حمود : خلاص انا بروح البس اللحين .. (يخرج حمود)
- (مجود يدق على باب احد البيوت)
- (يفتح الباب ويخرج له خروف دون ان ينتبه مجود)
- مجود : عيدكم مبارك يا اهل البيت ..
- (ينتبه مجود للخروف)
- مجود : عيدكم مبارك يا اهل البيت
- يه .. فله .. هالبيت يعيدون خرفان .. بس ايش اسوي فيه اليوم ذبحنا خروف العيد بس هذا عيديه ولازم اخذه ..
- (يحاول عبود ان يدخله في جيبه فلا يستطيع) وين احطه ما يدش في مخبائي ..

(تدخل مريوم وعبود وصلوح)

- صلوح : كاهو مجود اهنية
مريوم : مجود وينك انت احنا من الصبح اندور عليك ..
مجود : انا كنت اعيد
عبود : تعيد بروحك ..
مجود : دورت عليكم ما حصلتكم
عبود : مجود .. شنهو هذا اللي ماسكه في ايدك ..
مجود : اسد .. يعني ما تشوف خروف
مريوم : ابيه يا مجود .. ليش ما طلع الخروف معاك .. ابوي بيضربك
مجود : اشفيك انتي .. هذا مب خروفنا ..
مريوم : عيل خروف من ..
صلوح : اكيد حصلته شارد
مجود : لا .. هذا الخروف عيدوني اياه
عبود : حد يعيد خروف
مجود : يعني انا اكذب ..
مريوم : لا محد يقول انك تكذب .. بس كلامك غريب (يدخل حمود)
حمود : يالله يا عبود - يالله
(ينتبه لوجود الجميع) انتوا اهنيه .. يالله خلونا نروح نعيد يه .. مجود
من وين لك هالخروف ..
مجود : اشفيكم كل واحد يسألني من وين هالخروف
حمود : وين حصلته ..
مجود : ما حصلته .. هذا الخروف عيديه ..
حمود : عيديه ومحد عيدك بقره بعد
مجود : بعد انت يا حمود مب مصدق .. صدقوني انا طقيت الباب قتلهم عيدكم
مبارك عطوني خروف ..
حمود : انا اصدقك يا مجود
صلوح : وكم حصلت عيديه يا مجود ..
مجود : وايد ..

- صلوح : اميه
مجود : اكثر
عبود : ميتين ..
مجود : اكثر ..
حمود : خمس اميه
مجود : اقل ..
عبود : اربع اميه
مجود : اكثر ..
حمود : اربعميه وخمسين وخمسه ريال
مجود : اقل ..
مريوم : اربعميه وثلاثين ..
مجود : اقل ..
حمود : مجود قولنا كم جمعت ..
مجود : اربعميه ونص ريال ..
صلوح : اربعميه
مجود : ونص ريال
عبود : ونص ريال ..
مجود : واربعميه ..
صلوح : بس احنا من الصبح انعيد وما يجمعنا هالكتر ..
مريوم : تديرون ليش .. لأن كل اشوي رايعين الدكان او رايعين المعصره ..
حمود : مجود انت ايش بتسوي في عيديتك ..
مجود : باخشها علشان لين اكبر اشتري سياره ..
حمود : وبتركبني معاك ..
مجود : اكيد بتركب معاي انت والخروف
حمود : انزين ياالله خلونا نروح نعيد
مريوم : ياالله .. خلونا نروح هالصوب
عبود : ما نمر الدكان اشوي ..
مجود : ياالله تعال .. لا خلي هالخروف يعض اذنك

(يخرجون) ٠٠ (يدخل رشود وورده)

رشود : شاسوي يا وورده ما حصلنا ثياب حق اخوي فروج ٠٠

ورده : لأن كل الأطفال لابسين ملابس العيد

(نسمع صوت فروج من الخارج)

ص ٠ : وورده ٠٠ رشود

فروج

رشود : احنا اهنيه يا اخوي ٠٠ تعال اهنيه

فروج : اشلون اجيكم انا مب لابس ملابس العيد

ورده : تعال واحنا بندور لك ملابس للعيد

(يدخل فروج بملابس مبهذه)

فروج : انا اخوكم الكبير ما حصلتولي ملابس للعيد

رشود : حاولنا دورنا مال قينا

ورده : كل الأطفال لابسين ملابس العيد

فروج : يعني اشلون ما اعيد ليش ما بقتولي ملابس مثل ما بقتوا حق روحكم ٠٠

رشود : ما حصلنا قدك ٠٠

فروج : اللحين تروحون تبقون لي ملابس جديده ٠٠

ورده : من وين يا اخوي ٠٠

فروج : مب شغلي انا ابي اعيد وابي ملابس للعيد

رشود : احنا بعد نروح نعيد

فروج : ما تروحون تعيدون الا لما تحصلون لي ملابس العيد

ورده : بس احنا ما جمعنا عيديه ٠٠

فروج : بتروحون تعيدون من غير اخوك فروج

رشود : انا بعطيك نص عيديتي بس خلينا نروح نعيد ٠٠

ورده : ايه يا فروج خلنا نروح نعيد واحنا تعطيك نص العيديه

فروج : انا قلت محد يروح يعيد قبل لا تجيبون لي ملابس للعيد اعيد فيها

(نسمع صوت مجود وحمود من الخارج)

فروج : كنه في حد جاي ٠٠ خشوني ما ابي حد يشوفني هالشكل تعالوا ننخش ٠٠)

(يغنون)

(يدخل مجود وحمود ومعهم الخروف)

مجود : حمود انطرنى اهنيه ٠٠ انا بروح اودي الخروف البيت وباجيك
حمود : لا تتأخر يا مجود

(فروج يظهر هو اخوته)

فروج : شافين هالولد

رشود : ايه ٠٠ اشفيه ٠٠

فروج : شوفوا اشحلات ملابس ٠٠

ورده : ايه ملابس حلو ٠٠

فروج : ابيكم تبقون ملابس

ورده : اشلون ابنوق ملابس وهو لابسها ٠٠

فروج : مب شغلي ٠٠ انا ملابس ابيها ٠٠

حمود : مجود تأخر وايد ٠٠ للحين يربط الخروف

(يهجم الثلاثة عليه ويضربونه ويسرقوا ثوبه)

فروج : تحملوا بوصخون الملابس ٠٠ اشوي اشوي على الملابس ٠٠

(بعد ان ياخذوا الثوب) الله ثياب العيد للحين اقدر ارواح اعيد ٠٠ يا سلام

٠٠ (يلبس الثوب ويضع يده في جبه ٠٠ يا سلام ٠٠ فلوس ٠٠ ملابس

العيد والعيديه مره وحده يا سلام ٠٠

رشود : اخوي فروج ٠٠ هذي فلوس وايد

فروج : مب شغلك هذي فلوسي انا

ورده : مب هذي الملابس لي واللي فيها بعد لي مب عاجبكم ٠٠

فروج : ايه انا اخوكم الكبير ٠٠ ياالله خلونا نروح نعيد ٠٠

(يخرجون يدخل مجود ومعه الخروف)

مجود : غريبه وين راحو ٠٠ محد في البيت (ينظر لا يرى حمود) حمود وين

راح)

(يرى حمود على الأرض)

حمود ٠٠٠ اشفيك يا حمود وين ثياب العيد

حمود : مجود باقوا ثوبي ٠٠ ثوب العيد اللي عطيتني اياه

مجود : من هم ٠٠

- حمود : ما ادري .. ثلاثة .. لا اثنين ومعاهم وحده
- مجدود : وين راحو
- حمود : ما ادري وين راحو
- مجدود : (يخرج مجود الموبايل) باتصل في الشرطه ..
- حمود : ايه اتصل يا مجود بالشرطه ..
- مجدود : بس أي شرطه اتصل
- حمود : ما ادري .. اتصل بالمطافي
- مجدود : اشفيك انت ما تفهم .. المطافي علشان يطفون الحريق .. انا باتصل
المرور
- حمود : أي مرور .. المرور علشان السيارات مب علشان السرقات
- مجدود : ايه صح .. باتصل في مركز الشرطه وخلص
- حمود : اتصل .. اشفيك ما تتصل
- مجدود : ما عندي رقمهم ..
- حمود : من الحراميه
- مجدود : لا الشرطه ..
- (تدخل مريوم وصلوح وعبود)
- مريوم : مجود اشفيكم تاخرتوا علينا
- عبود : انا يوعان ابي ارواح اكل
- مجدود : انت خلصت السندويتشات اللي في المعاصر كلها ما تشبع
- صلوح : حمود .. وين ثيابك مالت العيد
- حمود : باقوها ..
- الجميع : باقوها
- مجدود : ايه الحراميه باقو ثياب حمود
- حمود : وطقوني بعد
- عبود : وينهم الحراميه
- مجدود : بينطرونك .. اكيد بيشردون ..
- مريوم : وايش بنسوي اللحين
- مجدود : انا باتصل في الشرطه

- مريوم : اتصل ٠٠
- حمود : بس ما نعرف رقمهم
- مريومم : اتصلوا في ٩٩٩
- مجدود : صح ٠٠ انا عرف رقمهم ٩٩٩
- حمود : انزين يالله اتصل
- مجدود : لحظه ٠٠ اشفليك انت مستعجل ٠٠
- (يضرب الرقم ٠٠٠) خلاص سويت لهم رنه وسكرت
- مريوم : ريش سكرت ٠٠
- مجدود : ما عندي رصيد ٠٠
- صلوح : اشتر من الدكان كرت ٠٠
- مجدود : صح ٠٠ ارواح اشترى كرت
- (يفتش جيبه فلا يجد عيدته ٠٠)
- مجدود : عيدتي ٠٠ فلوسي ٠٠ وين فلوسي
- عبود : أي فلوس
- مجدود : عيدتي اربعميه ونص ريال
- مريوم : دور عليها زين يا مجدود
- مجدود : دورت كل مخابي ماف ي شي
- حمود : يمكن خليتها في البيت
- مجدود : لا يا حمود انا ما شلت الفلوس من مخابي
- حمود : عيل وين راحت
- مجدود : وين راحت فلوسي ٠٠ عيدتي ٠٠
- مريوم : مجدود يمكن طاحت منك
- مجدود : لا مخباي كبيره بعدين اشلون اطيح وما احس فيها
- عبود : اكيد حد باقها ٠٠
- صلوح : اكيد حرامي باقها
- مجدود : ويش وراه الحرامي ان عندي فلوس
- حمود : صح يا مجدود اكيد الحرامي يدري عن الفلوس اللي عندك
- مجدود : محد يدري غيركم

- مريوم : ايش قصدك يا مجود
- مجود : انتي اختي بس يمكن في غيرك
- مريوم : مجود عيب تشك في اصدقائك
- مجود : ما في غير عبود كل اشوي يبي يروح المعصره من وين له الفلوس ..
- عبود : انا .. انا يا مجود ما بقت شي ..
- مجود : صلوح ما ادري ليش انا شاك فيك
- صلوح : لا .. لا انا ما بقتهم
- مجود : مريوم اذا انتي خذيتي فلوسي رجعيهم وباسمحك ..
- مريوم : مجود ايش هالكلام اللي تقوله
- مجود : لا تعصبين زين .. حمود .. حمود .. وين فلوسي
- حمود : بندورهم يا عبود
- مجود : حمود طلع فلوسي ..
- حمود : مجود انا رفيجك
- مجود : كلهم قالوا ما خذوا فلوسي ما في غيرك
- حمود : انا .. انا يا مجود اخذ فلوسك ..
- مجود : عيل من اللي باق فلوسي
- مريوم : لا تتسرع يا مجود ان بعض الظن اثم ..
- مجود : انا ابي فلوسي طلّعوا فلوسي خلوني افتشكم ..
- حمود : فتشنا اذا كان هالشي يرحيك ..
- (مجود يفتشهم فلا يجد شيء)
- (الجميع يتركوه ويذهبوا)
- راحو .. خلوني وراحو .. خلوني بروحي بس فلوسي راحت وربعي
- راحو بس من اللخ خذ خلوسي
- (ينظر للخروف) مافي غيرك طلع فلوسي ايه انت (يصدر الخروف
- صوتاً) ماء ما في غيرك ابي افتشك افتح حلجك ..
- حتى الخروف ما خذ فلوسي .. خلاص العيديه وبقوها بعيد مره ثانيه ..
- (يدق على احد البيوت فيخرج له رجل)
- عيدكم مبارك يا اهل البيع .. (يعطيه الرجل ريال) ريال يعني باقي ٣٩٩

ونص وبترجع عيدتي

(مجود يغير من شكله قليلاً ويعود لنفس البيت) عيدكم مبارك يا اهل البيت
(يخرج الرجل نفسه ويعطيه ريال) باقي ٣٩٨ ونص ٠٠
(يتنكر مرة اخرى ويعود لنفس البيت) عيدكم مبارك يا اهل البيت (يخرج
نفس الرجل ويعيدته ريال) يسرع مجود ويحاول التتكر فينتبه الرجل وما
ان يعود مجود ليكرر ذلك يصرخ عليه الرجل ويلحقه ثم يهرب مجود ٠٠

نهاية الفصل الأول

الفصل الثاني

نفس المنظر في الفصل الأول

(يدخل فروج وهو يعيد)

فروج : عيدكم مبارك يا اهل البيت ٠٠ (يلف على البيوت) محد راضي يعيدني)
يدخل رشود وورده (رشود ورده ٠٠ تعالوا اهنيه
رشود : ايش تبي ٠٠ احنا نبي نروح نعيد
فروج : عيدتوا وايد
ورده : انا جمعت سبعين ريال
رشود : وانا جمعت ثمانين ريال
فروج : انا ما جمعت غير عشرة ريال ٠٠ انا عندي فكره ٠٠ ايش راكم نجمع
الفلوس مع بعض ٠٠
رشود : لا ٠٠ لا خل كل واحد فلوسه عنده
فروج : معلية يا رشود ٠٠ انا برويك ٠٠
ورده : انا موافقه يا فروج
فروج : هذي اختي الصبيه ٠٠ مب انت ٠٠ يا الله هاتي فلوسك اخليهم عندي
ورده : بس بشرط ٠٠ نتقاسم الفلوس اللي عندك
فروج : أي فلوس يا ورده

- ورده : الفلوس اللي حصلتها في الثوب اللي بقتة
- فروج : هذي فلوسي انا
- ورده : بس احنا بقنا معاك
- فروج : خلاص ٠٠ كل واحد يخلي فلوسه عنده
- رشود : انزين انا بروح اعيد بتجون معاي
- فروج : ايش رايكم نروح الفريج الثاني
- ورده : فكره حلوه ٠٠ يالله ٠٠
- رشود : بس اخاف نقطع الشارع يمكن تدعمنا سياره
- فروج : لا تخاف انا اخوك الكبير معاك ٠٠ يالله تحرك
- (يهمون بعبور الشارع نسمع صوت ابواق السيارات وكل ما يحاولون عبود
الشارع نسمع صوت بوق او صوت فرامل سياره فيرجعون على الرصيف)
- رشود : ما في فايده ٠٠ ما نقدر نعبر الشارع
- ورده : ولا سياره راضيه توقف
- فروج : ما عليكم انا بخليهم يوقفون
- الإثنان : اشلون ٠٠
- فروج : نركض بسرعه واذا السيارات شافونا بيوقفونا
- رشود : اذا ما وقفوا بيدعمونا
- فروج : تعالوا معاي ٠٠ يالله بسرعه اركضوا
- (يجرون حتى وسط الشارع نسمع صوت فرامل قوي ثم نسمع صوت
اصطدام سياره)
- رشود : فروج ٠٠ صارت دعمه ٠٠ ايش نسوي اللحين
- فروج : يالله نشرد ٠٠ نشرد بسرعه
- (يهربون ٠٠ يدخل مجود ومعه خروفيه)
- : كل ربعي خلوني حتى مريوم اختي محد تم معاي غيرك يا خروفي عيديتي
- مجدود : باقوها واصدقائي اتركوني العيديه ما ابها بس ابي اصدقائي يرجعون لي
- ٠٠
- (يدخل رجل بعصبيه)

- الرجل : وينه ٠٠ وينه
- مجدود : منهو ٠٠
- الرجل : انت وين هلك ٠٠ اشلون تاركينك في الشارع ٠٠
- مجدود : انا ٠٠
- الرجل : ايه انت ٠٠
- مجدود : انا ايش سويت ٠٠ ما سويت شي
- الرجل : ما سويت شي ٠٠ والحادث اللي صار بسببك
- مجدود : أي حادي ٠٠ أي حادث ٠٠
- الرجل : تسوي نفسك ما تعرف شي ٠٠ مب انت اللي كنت تبي تعبر الشارع
- مجدود : لا ٠٠ انا توني جاي ٠٠ حتى اسأل خروفي ٠٠
- الرجل : على العموم ٠٠ الحمد لله الحادث بسيط ٠٠ بس لازم تفهمان في اشياء انتوا
تعتبرونها لعبه ممكن تكون خطر يهدد حياة الآخرين ٠٠
- مجدود : بس مب انا اللي بغيت اعبر الشارع
- الرجل : بعد تكذب
- مجدود : انا مب كذاب
- الرجل : الظاهر انك شيطان وهلك متلعوزين معاك ٠٠ الله يعينهم عليك ٠٠
- (يخرج الرجل)
- مجدود : اشفيه هذا علي ٠٠ انا ايش سويت ٠٠ انا اعرف اشلون اعبر الشارع بعدين
انا ما عبرت الشارع
- (يدخل فروج واخيه رشود وورده)
- فروج : زين اللي ما صادونا والا كان ودونا الشرطه
- رشود : كله منك يا فروج ٠٠
- ورده : السيارات بغت تدعنا
- فروج : بس ولا كلمه انا اخوكم الكبير ٠٠
- (يقترب منهم مجود)
- مجدود : انتوا ٠٠ انتو منهو
- فروج : احنا جايين نعيد ٠٠
- مجدود : انتو من فريجنا

- رشود : لا احنا من الفريج اللي احذاكم
- مجود : انتوا اللي كنتوا بتعبرون الشارع
- ورده : هذا اخوي فروج
- مجود : فروج .. انت ما تعرف اشلون تعبر الشارع
- فروج : لا .. اشلون يعبرون الشارع
- مجود : تعال انا بعلمك ..
- (يقترب مجود من الشارع والجميع خلفه)
- من اهنيه محد يقدر يعبر الشارع لأنه فيه خطر عليه وعلى الناس .. بس
- من عند خطوط المشاه تقدرن تعبرون الشارع علشان انتوا والسيارت
- تكونون بسلام ..
- فروج : بس السيارات ما كانت توقف لنا ..
- مجود : السيارات بتوقف لما تعبرون من عند خطوط المشاه ..
- رشود : صح كلامك .. انت ايش اسمك ..
- مجود : انا اسمي مجود .. وانت ايش اسمك
- رشود : انا اسمي رشود وهذي اختي ورده وهذا اخوي فروج
- ورده : هذا الخروف لك
- مجود : هذا خروف العيد هو اللحين صديقي بعد ما تركوني اصدقائي
- فروج : وين راحوا اصدقائك
- مجود : اصدقائي ازعلوا مني واتركوني
- فروج : (ينادي رشود وورده) رشود ورده تعالوا
- اسمعوا انا لازم اخذ منه هالخروف
- ورده : بس اشلون بنبوقه
- فروج : انا بتصرف معاه .. تعالوا وراي .. (يقتربون من مجود) مجود .. انا
- واخواني رشود وورده بنصير اصدقائك
- مجود : صح وانا بعد بصير صديقكم
- فروج : بس اختي ورده خاطرها تلعب مع الخروف ..
- مجود : ايه خلها تلعب
- ورده : بس انا اخاف من الخروف

- مجود : لا تخافين ما يعض ..
- فروج : احنا بناخذ الخروف وبنلعب معاه وبنرجعه لك ..
- مجود : انزين وليش ما اجي معاكم العب مب انا صرت رفيجكم .. خلاص ..
- فروج : ايه صح انت رفيجنا .. بس ..
- رشود : لا نبي بس احنا مستعجلين .. بنرجع بعدين بنلعب معاك ومع الخروف ..
- ياالله خلونا نروح
(يخرجون)
(يدخل حمود وعبود ومريوم وصلوح)
- حمود : مجود .. مجود ..
- مجود : حمود مريوم عبود صلوح ربعي .. سامحوني .. انا اسف .. انتوا لما خلتنوني بروحي حسيت نفسي وحيد انا عيديتي ما ابيها .. ابيكم تكونون معاي ..
- حمود : احنا مسامحينك يا مجود ..
- صلوح : احنا ربعك
- مجود : بس انا ما ادري ليش شاك فيك يا صلوح
- مريوم : مجود انت للحين شاك فينا ..
- عبود : احنا عرفنا وين عيديتك
- مجود : حصلتوها .. حصلتوا عيديتي
- حمود : لا ما حصلناه بس عرفنا وين هي ..
- مجود : وين ؟؟
- حمود : انت ما عطيتني ثوبك علشان اعيد فيه
- مجود : حمود .. انا ما ابي حد يعرف
- مريوم : ليش ما تبني حد يعرف
- مجود : علشان حمود لا يتقشل
- صلوح : اللي عنده صديق مثلك يا مجود لازم يفتخر فيه
- مجود : بس انا شاك فيك يا صلوح
- حمود : لا يا مجود .. عيديتك كانت في الثوب اللي عيطتني اياه
- مجود : يعني انت اللي ماخذ عيديتي ..

- حمود : لا ٠٠ انا ما خذت عيديتك بس انت عطيتني ثوبك ولما تذكرت قلت اكيد
عيديتك في ثوبي
- مجدود : صج يا حمود كانت في ثوبي اللي عطيتك اياه ٠٠ وين ثوبي
- مريوم : الثوب ٠٠ خذوه
- مجدود : من اللي خذات
- صلوح : انت نسيت ان الحراميه باقوا ثوب حمود
- مجدود : انا شاك فيك انت
- عبود : اللحين خلونا ندور على الحراميه
- حمود : صج ٠٠ احنا لازم نحصلهم علشان نرجع عيديه مجود وثوبي
- مجدود : بعد صار ثوبك
- حمود : قصدي ثوبك ٠٠
- مجدود : انزين ياالله خلونا نروح ندور عليهم ٠٠
(يخرجون)
(يدخل فروج ورشود وورده)
- فروج : (يعاتب اخيه رشود) كله منك ٠٠ ليش تقوله احنا مستعجلين بنروح البيت
كان اللحين خذنا الخروف منه
- رشود : كان بيكشفنا ٠٠ انا اقول خلنا من الخروف وخلنا نرجع البيت
- ورده : لا ٠٠ انا ابي الخروف
- فروج : وانا بعد ابي الخروف
(يدخل مجود متتكرأ برداء الخروف)
- ورده : فروج هذا هو الخروف
- رشود : بروحه ٠٠ خلنا نصيده قبل لا يجي مجود
- فروج : ياالله بسرعه حاولوا امسكوه ٠٠
(يحاولون الإمساك به ٠٠ لكنه يستطيع الهرب وهم ما زالوا يحاولون ٠٠
يدخل حمود بعربة الإيسكريم متتكرأ ببائع الإيسكريم)
- حمود : ايسكريم ٠٠ ايسكريم ٠٠
- ورده : رشود ٠٠ فروج خلونا نروح نشتري ايسكريم ٠٠
- فروج : اول نصيد الخروف

- حمود : هه ٠٠ هذا الخروف مالكم
- فروج : ايه خروفنا شارد منا ٠٠
- حمود : انا بمسكه لكم ٠٠ (يقترب من مجود) مجود هذول هم الحراميه اللي باقوا
ثوبي
- مجود : متأكد يا حمود
- حمود : متأكد ٠٠ هم اللي اضربوني ٠٠
- مجود : هذول ربعي فروج ورشود وورده
- حمود : ربعك ٠٠ لا لا هذول الحراميه
- مجود : انزين خلنا نمسكهم ٠٠
- حمود : لا ٠٠ لا خلنا نكمل الخطه (يمسك مجود) مسكت لكم الخروف
- فروج : (يمسك عنه الخروف) شكراً عطني الخروف
- حمود : ما تبون تشترون ايسكريم ٠٠
- ورده : انا ابي ايسكريم
- رشود : وانا بعد ابي ايسكريم ٠٠
- فروج : مب وقته اللحين ٠٠ بعدين ٠٠ خلونا نودي الخروف البيت (يسحبهم ومعه
الخروف ويذهب)
- عبود : هه ٠٠ عرفتوا الحراميه
- حمود : ايه ٠٠ عرفناهم ٠٠
- مريوم : بس خذوا اخوي مجود
- حمود : لا تخافين مجود بيعرف بيتهم وبيرجع لنا
- صلوح : لو هجمنا عليهم وضربناهم ٠٠
- عبود : ايه احنا اقوى منهم
- حمود : لا تخافون بنصيدهم ٠٠ بس خلونا نكمل الخطه
(يدخل عليهم مجود)
- مجود : هيه ٠٠ حمود ٠٠ عبود ٠٠ صلوح ٠٠ مريوم ٠٠ انا رجعت
- حمود : ليش رجعت يا مجود
- مجود : انا غيرت الخطه
- حمود : يعني ما عرفت بيتهم

- مجدود : لا عرفت بيتهم وبعدين شردت ٠٠ اللحين اكيد هم بيلحقوني ياالله تعالوا
انخشوا
- حمود : وشنهى الخطه الجديده
- مجدود : تعالوا وبقولكم عليها (يختفون خلف البيوت) (يظهر فروج واخوته)
- فروج : شرد ٠٠ انا غلطان اللي خليتكم تمسكونه ٠٠ ياالله دوروا عليه
- رشود : انا تعبت يا فروج
- فروج : دور معاي على الخروف والا بتتضرب اللحين ٠٠
- رشود : حاضر بدور ٠٠
- فروج : ورده انتي دوري هالصوب ورشود يدور هالصوب وانا بدور اهنية (تخرج ورده وكذلك يخرج رشود حسب الجبهه التي اشار اليها فروج)
(تدخل مريوم وكانها لا ترى فروج)
- مريوم : (تخرج عيديتها وتعدھا) ميه وعشر ميه واحد عشر ٠٠ واثتتش الله عندي عيديه وايد ٠٠
- فروج : يا سلام هذي العيديه لو خذتها بيصير عندي فلوس وايد لازم ابوقها منها ٠٠
(يهم علي مريوم ويخطف العيديه ويهرب)
(يخرج مجود وحمود وصلوح وعبود بسرعه فيقعوا وما ان ينهضوا يكون فروج قد هرب)
- مريوم : (تبكي) باق عيديتي ٠٠ شرد انتوا تأخرتوا وخليتوه يشرد
- عبود : اللحين بنلحقه
- حمود : هذي خطه مجود الفاشله
- مجدود : انا خططي مب فاشله ٠٠ بعدين انا اعرف بيتهم
- حمود : ياالله زين خلونا نلحقه على البيت
- مجدود : انتوا انطروني اهنيه بروح اصيده
- حمود : لا كلنا بنروح
- مجدود : ياالله انزين (يخرجون) ٠٠ (يدخل رشود وورده)
- رشود : هه ٠٠ يا ورده حصلت شي
- ورده : لا ٠ انت حصلت شي ٠٠
- رشود : يعني ما تشوفين يدي خاليه وين راح فروج

- ورده : يمكن يدور على الخروف
- روشد : ويمكن حصل الخروف وراح البيت
- ورده : ياالله نروح البيت (يدخل فروج هارباً)
- فروج : رشود ورده خشوني ٠٠ خشوني ٠٠
- رشود : اشفيك يا فروج
- فروج : مجود وربعه يلحقوني ٠٠
- ورده : انزين خلنا نشرد ونروح البيت ننخش
- فروج : اعرقوا بيتنا لازم نشرد ٠٠
- رشود : هم ليش يلحقونك ٠٠
- فروج : انا بقت فلوس البنيه وشردت
- ورده : يعني كشفونا
- فروج : ايه ٠٠ اعرقوا ان احنا اللي بقنا ملابس العيد
- رشود : شنسوي اللحين
- فروج : تعالوا ننخش في أي مكان ٠٠ اكيد اللحين هم جايين صوبنا (يهربون)
- (يدخل مجود مع مجموعته)
- مريوم : (تدخل وهي تبكي) انا مالي خص ابي عيديتي
- مجدود : مريوم هذا انا باقوا عيديتي بعد
- حمود : اللحين اشلون بنحصلهم ٠٠
- صلوح : انا عندي فكره ايش رايكم
- مجدود : (مقاطعاً) لا فكرتك مب حلوه ٠٠ فكر بغيرها ٠٠
- (يفكرون)
- حمود : حصلت الفكره
- مجدود : شنهيا حمود ٠٠ قول
- حمود : انا ومجدود وصلوح بنفذ الخطه
- مريوم : وانا عبود شنسوي ٠٠
- حمود : انتوا ترحون البيت
- عبود : لا انا مب راجع البيت ٠٠ لازم اصيد الحراميه معاكم
- مجدود : خلاص خلهم يجون معانا

- حمود : ما يصير يا مجود بيخربون الخطه
- مجدود : اللحين انت قلنا شنهى الخطه اول
- حمود : انا بقولكم بس تعالوا معاي علشان نبداً انفذها
- مريوم : وانا وعبود نجي معاكم
- مجدود : انتوا ٠٠ انتوا خلکم احتياط يمكن نحتاجكم
- حمود : يالله بسرعه يا مجود
- (يخرج مجود وصلوح وحمود ويبقى عبود ومريوم)
- عبود : ليش احنا ما رحنا معاهم
- مريوم : خلنا ننظرهم نشوف ايش ببسون
- عبود : لا انا ما راح انظرهم ٠٠ انا بعد عندي خطه مثلهم
- مريوم : خطه شنهو
- عبود : خطه علشان نمسك الحراميه
- مريوم : بس هم راحو يمسكون الحراميه
- عبود : اسمعي مريوم احنا بنمسك الحراميه قبلهم
- مريوم : اشلون يا عبود
- عبود : تعالى معاي وانتى بتعرفين (يخرجان)
- (يدخل فروج متسلل وخلفه ورده ورشود)
- رشود : اخوي فروج انا خايف
- فروج : لا تخاف ٠٠ خلك مثل اخوك شجاع
- ورده : انت بعدخايف يا فروج
- فروج : بس خلاص ولا كلمه خلوني افكر شنسوي اللحين
- رشود : ايش بتسوي
- فروج : فكروا معاي ٠٠ كله افكر بروحي خلاص ما ابيكم تفكرون انا بتصرف
- ورده : ايش بتسوي قولنا
- فروج : مب شغلکم انتوا خلکم اهنیه راقبوا المكان وانا بروح اشوي وبرجع لكم
- رشود : وين بتروح
- فروج : بعدين بتعرفون ٠٠ انطروني اهنیه ولا تخلون حد يشوفکم ٠٠ فاهمين ٠٠)
- (يخرج فروج)

- ورده : انا خايفه يا رشود
- رشود : وانا بعد خايف ٠٠ بس شاسوي فروج اخونا وبيتصرف
- ورده : يمكن مجود وربعه يروحون يعلمون علينا الشرطه ٠٠
- رشود : عاد لا تخوفيني (يدخل عبود ومريوم وهما متكرران بزي دمی)
- عبود : هذا هم يا مريوم يا الله تعالي معاي
- (مريوم وعبود يقتربون من رشود وورده)
- (رشود وورده يخافان)
- مريوم : لا تخافون ٠٠ لا تخافون منا
- ورده : من انتوا ٠٠
- مريوم : احنا العاب الأطفال
- رشود : العاب الأطفال ٠٠ اشلون يعني
- مريوم : احنا الألعاب اللي يحبونا الأطفال جينا اليوم نحتفل معاكم بالعيد ونلعب معاكم
- عبود : لأن احنا نحبكم
- رشود : يا سلام ٠٠ يعني انتوا بتلعبون معانا
- عبود : ايه بنلعب معاكم
- ورده : انا ما عندي العاب وخاطري يكون عندي العاب
- مريوم : بس احنا العاب كل الأطفال وما نلعب الا مع الأطفال الشطار الطيبين ٠٠
- رشود : احنا طيبين ٠٠ بس ٠٠
- عبود : بس شنهو ٠٠
- ورده : بس اخوي فروج هو اللي يخلينا اشرار
- مريوم : انتوا ليش تبقون ثياب العيد
- رشود : هه ٠٠ انتوا اشدراكم
- مريوم : احنا نعرفكم من زمان بس ما نحب نلعب معاكم لأنكم حراميه انتوا بقتوا
- ثياب العيد مالت الأطفال
- ورده : لأن ما عندنا ثياب جديده
- مريوم : العيد مب ثياب جديده العيد فرحه اكبر ٠٠ فرحة الناس كلها ٠٠
- عبود : وليش بقتوا عيديه مجود وعيدية مريوم
- رشود : مب احنا هذا فروج

- عبود : انتوا ساعدتوه ٠٠
- ورده : نخاف يضربنا ٠٠
- مريوم : يعني خفتوا من اخوكم فروج ٠٠ وما تخافون من الله
- عبود : كان لازم ترفضون عقاب رب العالمين اكبر
- رشود : كلامكم صحيح يا رب سامحنا
- مريوم : يعني ما راح تبقون شي بعد اليوم
- ورده : لا خلاص ٠٠ تبنا
- عبود : واخوكم فروج
- رشود : ما راح نسمع كلامه ونغضب ربنا
- مريوم : هالشكل احنا راح نلعب معاكم
- عبود : ياالله تعالوا معانا نلعب ٠٠ (يخرجون)
- (يدخل مجود وحمود وصلوح وهم مختفين داخل براميل زباله متحركه)
- مجود : حمود ٠٠ حصلتهم ٠٠
- حمود : لا ٠٠ للحين محد طلع ٠٠
- مجود : صلوح اذا شفت حد فيهم قولي
- حمود : مجود انا سامع صوت جاي صوبنا
- مجود : صوت ٠٠ صوت شنهو
- حمود : صوت يقول مياو
- مجود : هذول قطاوه شنسوي اللحين ٠٠
- صلوح : مجود ٠٠ حمود ٠٠ انا سامع صوت جاي صوبنا ٠٠
- مجود : انخش ٠٠ حمود ٠٠ انخش هذا فروج الحرامي ٠٠
- (يدخل فروج وهو يأكل الموز ويرميه على الأرض)
- (مجود يقترب منه ويضربه على رأسه)
- فروج : من اللي ضربني
- مجود : انا برميل الزباله ٠٠ حافظ على نظافة مدينتك
- فروج : يعني شا اسوي ٠٠
- مجود : يعني تشيل قر الموز وتقطه في برميل الزباله
- فروج : حاضر ٠٠

- (ياخذ القشر ويرميه في برميل حمود ويقى جزء على الأرض)
- حمود : (يضرب فروج) انت شنهو ؟ هالكثر تاكلون موز يالله شيل كل القشور وخطها في برميل الزباله ..
- فروج : وبعدين .. ما راح اشيل شي .. وين رشود وورده راحو .. ليكون صادوهم (ياكل القشر ويرمي على الأرض ويقترّب منه الثلاثة وهم داخل البراميل)
- مجود : (يضربه) احنا ايش قلنا
- فروج : معليه ياب رميل الزباله هالمره سامحني لأنني انا مسوي خطه
- حمود : وشنهى الخطه .. اللي تخليك توصخ الشارع ..
- فروج : انا اكل الموز واقطه على الأرض علشان يشوفني مجود وربعه ولما يحلقوني يطيحون وينكسرون
- مجود : خطه حلوه .. بس بعد ما ينكسرون من ببشيل هالقشور من الأرض
- فروج : ما ادري .. المهم الخطه تتجح واقدر اشرد
- صلوح : حمود .. مجود .. اطلع
- حمود : خلك مكانك .. لا تطلع ..
- (يدخل رشود وورده ومريوم وعبود باشكالهم الطبيعية)
- فروج : رشود ورده وين رحتوا
- رشود : احنا رحنا نلعب مع العاب العيد ومع مريوم وعبود
- فروج : اشلون وهذا وقت لعب
- ورده : خلاص يا فروج احنا ما راح نسمع كلامك .. احنا ما راح نبوق
- فروج : شنهو .. انا اخوكم الكبير واللي ما يسمع كلامي بضربه
- رشود : من اليوم ما راح نخاف منك .. مريم وعبود علمونا الطريق الصحيح
- فروج : معليه يا رشود .. معليه يا ورده برويكم ..
- حمود : مجود نهجم عليه اللحين ..
- مجود : لحطه .. قاعد اتهاوش مع قطو دش على الدرام
- حمود : هذا وقته يا مجود
- مجود : يالله استعدوا صلوح انت جاهز
- صلوح : هذا الرقم موقوف مؤقتاً ..

- حمود : الظاهر ان صلوح نام
- مجدود : يالله نهجم انا وانت هجوم
- (يخرجان) ما ان يراهم فروج يهم بالهرب فيسقط متزحلقاً بقشور الموز)
- فروج : اخ ٠٠ رجلي ٠٠ أي يا رجلي ٠٠ رجلي انكسرت ٠٠
- مريوم : يا جماعة يالله خلونا نسعفه
- (يخرج صلوح من البرميل)
- صلوح : هجوم ٠٠ (يتزحلق هو الآخر بقشون الموز ويقع على رجل فروج)
- (يصرخ فروج متألماً)
- فروج : الحقوني ودوني المستشفى
- حمود : مجود ٠٠ ايش نسوي
- مجدود : احنا نتصل بالإسعاف خلهم يجون ياخذونه
- عبود : انا اعرف رقم الإسعاف ٩٩٩ (يتصل مجود من الموبايل)
- مجدود : شفت يا فروج هذي نهاية طريق الشر ٠٠
- فروج : سامحوني ٠٠ سامحوني انا خلص باتوب وما راح ابوق حد
- مجدود : وين عيديتي
- فروج : عيديتك وعيدية مريوم عندي ٠٠ خذوها ٠٠
- حمود : وانا ابي ثوبي
- فروج : راح ارجع لك ثوبك
- (يدخل رجال الأسعاف وياخذون فروج)
- حمود : واللحين نقدر نحتفل بالعيد
- رشود : واحنا
- مجدود : انتوا بتكونون معانا العيد عيد كل الناس وفرحتة لكل الناس

ستار النهاية